

Republica Bolivariana de Venezuela cu conmemoracion y condecoracion postumo na Libertador Betico Croes

ORANJESTAD (AAN) -- Señor Mario Arias Salas, Diputado di "La Asamblea de la República Bolivariana de Venezuela" y di Parlamento Andino, y ademas presidente di "Comision de Desarrollo del Ambiente y la Lucha Antidroga" a realiza un bishita di trabao na Aruba cu varios objetivo pa cumpli. Pero en todo caso, e motivo

principal di su bishita ta pa invita Ministro Glenbert Croes, como Vicepresidente, na un Conferencia di lucha antidroga den cual ta bay participa Congresistanan Mericano y di e Region Andino. Diputado Mario Arias Salas ta ademas, dirigente del Movimiento Quinta Republica (MVR) del Presidente Hugo Chavez Frias, cu ta

hopi interesa na re-activa e lazonan di amistad entre Venezuela y Aruba, como tambe yega na un acuerdo di integracion economico di ambos banda.

Den compania di Ministro Glenbert Croes, Diputado Arias Salas, hunto cu otro funcionarionan Venezolano, a bishita redaccion di DIARIO, unda el a worde entrevistado.

CEREMONIA NA HONOR DI BETICO CROES:

Den e cuadro di un esfuerzo conhunto pa yega na entendimentonan na beneficio di ambos pueblo, esta Aruba y Venezuela, Diputado Arias ta e persona cu ta coordinando un evento di ceremonia di Conmemoracion y condecoracion postumo di Libertador Betico Croes, cu lo tuma lugar na Augustus proximo na Venezuela, unda lo inaugura algun plaza y caminda cu e nomber di nos heroe nacional.

A scoge e luna di Augustus pa recorda cu na Augustus di 1977 a tuma lugar e revolucion di Aruba asina yama "e anochinan secur", cu tabata e confrontacion na Aruba cu e comando policial di Curacao. E conmemoracion aki ta parti di un proyecto pa re-establece e nexonan cu semper a existi entre Venezuela y Aruba y cu ultimo temponan a worde un tiki descuida.

Diputado Arias a expresa: "Nos gobierno y Partido OLA tin un interes mutuo pa re-establece e nexonan cu a existi entre Aruba y Venezuela, y activa e integracion economico, teniendo cuenta cu na America Latino Venezuela ta e unico frontera cu tin cu Hulanda a travez di Aruba, y cu Francia pa medio di e Caribe Frances".

Diputado Arias a agrega cu algo hopi interesante ta e posibilidad presente di por establece vinculonan cu e union Europeo, ya cu e "La Comunidad Andina de Naciones" (CAN) y e Union Europeo ta e dos sistemanan grandi di integracion comunitario na mundo.

REUNION DI CONTACTO:

Diputado Arias a splica cu tin un convenio di Lucha Antidroga entre Venezuela y Aruba, cual tey pero no ta ac-



Diputado Mario Arias den compania di Ministro Glenbert Croes y e Director di DIARIO, Jossy M. Mansur.

tivo.

"Awetardi nos ta bay reuni cu Ministro Lili Beke-Martinez, pa conversa riba e tema di integracion economico entre e Union Andino y e Comunidad Europeo a travez di actividadnan economico entre Venezuela y Aruba, como tambe riba e tema di lucha contra droga.

E intencion ta pa na corto plazo coordina un encuentro cu Parlamento di Aruba y Gobierno Arubano, cu por duna como resultado e firma di un convenio di cooperacion entre ambos pais.

Tambe for di reunion aki nos kier coordina un bishita oficial di Presidente Hugo Chavez Frias na e Isla di Aruba", Diputado Arias a duna di conoce.

El a haya importante tambe pa menciona aki cu e prome contacto cu Ministro Glenbert Croes a inicia e dia cu a batiza e buki di Jossy Mansur 'Corazon Maestro' na Venezuela, unda a planifica e encuentro aki entre Glenbert cu su persona.

CONFERENCIA ANTIDROGA:

Diputado Arias a elabora en corto tocante e Conferencia relaciona cu e lucha antidroga cu lo tuma lugar otro luna na Caracas, Venezuela:

"Dia 28 y 29 di Augustus proximo lo tuma lugar e Conferencia relaciona cu Narcoactividad, den cual lo ta presente personalidadnan reconocida manera: Marck Sauder, Presidente di e Sub Comité Antidroga di Congreso Mericano; Cass Ballinger, Presidente di Comité Hemisferio Occidental di

Congreso Mericano; y e presidentenan di Comisionan Antidroga di e gobiernonan di e cinco paisnan Andino. Ademas ministro Glenbert Croes lo ta compaña pa señor Jossy Mansur.

Tambe Ministro Glenbert Croes a tuma palabra expresando:

"E foro na Caracas lo ta e plataforma unda den un forma hopi concreto nos lo cuminza delibera riba e formanan di cooperacion entre nos paisnan. E fruta di e contacto y e entendimento entre Diputado Mario Arias y mi persona di Aruba, lo ta un acuerdo di cooperacion entre nos paisnan".

DEN NOMBER DI PUEBLO ARUBANO:

Ministro Glenbert Croes a agrega: "Pueblo di Aruba for di awor ta duna danki pa e forma profesional con Gobierno Venezolano y especificamente Presidente Hugo Chavez, ta bay duna un condecoracion postumo di mas halto na nos Libertador Betico Croes, unda cu Diputado Mario Arias a bin pa coordina e gesto aki di Republica Bolivariana de Venezuela".

Riba potret por observa Ministro Glenbert Croes hunto cu Diputado Mario Arias Salas.

**TELEFONNAN
DI DIARIO
826747
FAX
828551**